Universal Declaration of Human Rights - Bushi

© 1996 – 2009 The Office of the High Commissioner for Human Rights

This HTML version prepared by the *UDHR in Unicode* project, http://www.unicode.org/udhr.

TAFASWIRI AN-KIBUSHI NIM-MATEKELEZO KI DUNIA NIN-HAKI-L-ADAMÌ

ALUHA NIN-VUDIN'NI KURANA

An-fahitana amba, fikuɓaliana amba ɓinadamu djabi nitirahinyi ndreka usheu ndreka haki merana nandzari ro musingi nin-nafasi, nin-haki ndreka usalama duniani ;

An-fahitaŋa amba, tsifahizaŋa ndreka fipuzisaŋa haki-l-adamì ro mikutsonga faŋanovaŋa shitrendro ki katili maneitri rohu nin-umati djabi, amin'ni zenyi, fitunga nin-ulemengu mbu kuruhusu ɓinadamu ivulaŋa ndreka ikwamini aminnafasi, ɓilà tahutru wala taãɓu nin-ufukara, ro nikutekelezaŋa kirasimi, ustaãraɓu beheben-djabi ninhulumbelu ;

An-An- fahitaŋa amba, aŋatin'ni sharia-musingi nin-ndreu, zanatani nin-Uvumoja nin-Twaifa (Shama nin-Daula nin-Ulemengu) nikutekeleza mara hafa uaminifu nin-ndreu amin'ni haki musingi nim-ɓinadamu; amin'ni usheu ndreka kima ninhulu an-rohuni, amin'ni fihiraŋa nin-haki nin-lalahi ndreka viavi, amin'zenyi, reu nampahei amba reu nangala ãzima ampadeha aluha faŋadzarisaŋa maisha nimɓinadamu ndreka ampiditri an-lalaŋa raha mbu andei tanafu tsara am-maisha nin-nafasi nankitinyi nimɓinadamu; ahitaŋa amba, nikulazimu natou nguvu fihavaŋana ɓainan'ni tani ndreka tani;

An- fahitaŋa amba, Daula Aŋatin-shama itì ndreka shama nin-Uvumoja nin-Twaifa (Shama nin-Daula nin-Ulemengu) nangala wahadi an-ndreu aŋaraka kaɓaru retu atà haki-ladamì ndreka nafasi musingi ikustehinyi nankitinyi amin'ni dunia mafia ;

An- fahitaŋa amba, fikutrugaŋa djumla nin-sharia ndreka nafasi retu nandzari muhimu swafi an-fikustehiaŋa namuna kulazimu, wahadi itì ;

Trengwe djumla nampahei amba Matekelezo ki Dunia nin-Haki-l-Adamì itì

ro daradja aŋabuŋabun-djabi nin-ustaãraɓu nikulazimu nahazu nin-kula karazaŋa zanatani ndreka nishani, anga ɓinadamu djabi ndreka kula karazaŋa ninfikueshiŋandreu, ihisi Matekelezo itì daima amin'ni luhan-ndreu, aŋanu djitihadi amin'ni fampidzuruaŋa ndreka fitarimiaŋa, ampiasa masitaha nin-sharia ndreka nafasi retu ; amin'ni zenyi, aŋanu modeli ata, amin'ndreu maŋapiditri an-lalaŋa moramora-moramora satua mifotutru tani ou mifotutru dunia, reu ikutsonga ata fikuɓaliaŋa ndreka fikurumiaŋa reu itì, ike nin-ankitinyi amin'ni dunia mafiha ; rangu amin'ni zanatani nin-Daula aŋatin'ni Uvumoja nin-Twaifa (Shama nin-Daula nin-Ulemengu) ata an-tani amin'ni hifadhwi ni sharian-ndreu.

Kanuni aluha

Binadamu djabi nitirahinyi an-nafasi, reu bokeu mirana amin'ni usheu ndreka haki. Reu teraka ndreka ãkili ndreka hikima, amin'ni zenyi, reu nikulazimu nisi twerana nin-fihavana reu sambi reu.

Kanuni faha aroini:

Kula hulunu meti mikudai fikurumianana amin'nazi ninsharia ndreka nafasi retu djabi, nivulanana amin'ni Matekelezo itì, wala tsisi fifidanana tsokao yotsi, mfano mifotutru kabila, range (nin-nenyi), lalahi au viavi, fivulanana, dini, fikira ki siasa au fikira hafa tu, tani nibwahana au daradjan-hulunu, mali, teraka au kabaru hafa tu.

Boka eu, tsi uhisi fifidanana tsokao yotsi mbu atou hatasiɓaɓun' ni daradja nin-siasa, nim-mahakama au hatasiɓaɓun'ni abezan-tani au gitro nin-tani nibwaha ninhulunu; neka tani iu au gitro nin-tani iu huru, nikutawalan'ni tani hafa, tsi mahaleu tena au nikupunguzana yezi.

Kanuni faha teluni:

Kula shumbe-binadamu misi haki an-fikueshiana, annafasi ndreka an-hifadhwi nin-nafusini.

Kanuni faha efatrani:

Tsisi hulunu mbu atou andevu au andivuzana : fandivuzana ndreka kula kalite nin-fanyiraha ki andevu, tsi kuruhusunu.

Kanuni faha dimini:

Tsisi hulunu mbu atou matriko, wala fihezinyi ou kudilinyi kara raha tsisi manani ou atou raha mikulanisa izi.

Kanuni faha tshutani:

Kula hulunu misi haki an-fikuɓaliana haki nazi kula mahala misi izi.

Kanuni faha fituni:

Hulunu djabi mirana an-lalana ki sharia ndreka misi haki djabi bilà fifidanana, an-hifadhwi mirana nin-sharia. Hulunu djabi misi haki mirana an-sharia mikuhifadhwi hulunu ndreka kula ubanguzi mandeha kinyume ndreka Matekelezo itì, ndreka kula fikutsotsana ubanguzi itì.

Kanuni faha valuni:

Kula hulunu misi haki an-fandihanana mikushitaki ammahakama nin-tani misi maãrifa amin'ni kabaru nazi, neka haki-musingi nazi, boka eu nikubalin'ni sharia be musingi ou sharia tu, tsi nikusutehinyi.

Kanuni faha sivini:

Tsisi hulunu mbu heti tanin-sirikali ou gadrani lajoli ou atuwatanini bilà sibabu.

Kanuni faha fuluni:

Kula hulunu misi haki, an-fihirana swafi, an-fananovani modeli atà hadja nazi urenyim-mahakama tsi kisirikali, tsi mampinonu hila, an-lalana nin-haki ndreka anyivunntrengwe. Mahakama itì ro mbu ahei neka hulunu itì amin'ni haki nazi ndreka farudhwi nazi au mashitaka natona izi itì manaraka lalana.

Kanuni faha fulu areki ambini:

- 1. Kula hulunu nikuhutumunu ndreka taɓia ratsi, kaza taninyi ndreka halathwi paka izi kuhukumunu kirasimi am-mahakama mbiana an-trengwe, amin'izi eu, kula kabaru miditri amin'ni difãi nazi djabi nikurumianana.
- 2. Tsisi hulunu mbu vangona kubei hatasiɓaɓun'ni ãmali au raha tsi nishugulinyi, ndreka wakati nananovana reu itì, reu tsi nalana amba taɓia ratsi amin'ni sharia nin-tani au nin-ulemengu. Boka eu kua, tsisi raha rati mandiltra inyi fa vua hulunu lera nananovana taɓia rati retu, mbu vua hulunu kua.

Kanuni faha fulu aroi ambini:

Tsisi hulunu mbu hidirana ɓila siɓaɓu, am-maisha ninantanana nazi, amin'ni havana nazi, amin'ni tranu nazi au amin'ni ɓarua nazi; wala tsisi hulunu mbu hiditri amin'ni kabaru mbu ikupua hulunu usheu, mbu andatsaka izi.

Kula hulunu misi haki an-hifadhwi ninsharia mamahana fidirana an-hulunu ndreka fikufutsuhana maisha nin-hulunu.

Kanuni faha fulu telu ambini:

- 1. Kula hulunu misi haki an-fidirana ndreka fibwahana an-nafasi ndreka an-fifidanana mahala ipitrahani anatin'ni Daula .
- 2. Kula hulunu misi haki an-fibwahani an-nakwakila tani, ata an-tani nazi, ndreka an-fipudiani an-tani nazi.

Kanuni faha fulu efatra ambini:

- 1. Am-mahala misi udilifu, kula hulunu misi ruhusa mitsakaraka mahala ififiana, boka eu, misi furswa ahazu mahala ififiani amin'ni tani hafa.
- 2. Sharia iti tsi heti kurumianana neka hulunu mila ikurumianana izi itì, tsakarahin'ni sirikali hatasiɓaɓun'ni shidrendro natoni niditri amin'ni ɓaãdhwi nin-shidrendro nikudukurunu amin'ni sharia djumla au hatasiɓaɓun'ni taɓia natoni tsi miaraka ndreka madhumuni ndreka makuswada nin-Uvumoja nin-Twaifa (Shama nin-Daula nin-Ulemengu).

Kanuni faha fulu dimi ambini:

- 1. Kula hulunu misi haki an-fazahuana uraĩa.
- 2. Tsisi hulunu mbu heti fahanana kaza ahazu uraĩa au amadiki uraĩa, ɓilà siɓaɓu.

Kanuni faha fulu tshuta ambini:

- 1. Neka reu fa kutsimu, lalahi ndreka viavi nin-kula nishani, kula uraĩa au kula dini, meti manambadi ndreka miteraka zanakan-ndreu. Hakin-ndreu amin'ni kabaru mifotutru vadiaŋa meraŋa, lera reu amin'ni vadiaŋa ndreka lera reu miboŋu.
- 2. Vadiana mbu heti atou neka bwana harusi ndreka bweni harusi nikuɓali izi itì.
- 3. Fihisiana havana iu raha amin'ni vatan-hulunu boka eu muhimu amin'ni maisha ki udjamaã ; izi itì misi furswa ahazu hifadhwi nin-udjamaã ndreka nin-Daula.

Kanuni faha fulu fitu ambini:

- 1. Kula huluŋu, rangu inyi mipetraka izi areki ata inyi mipetraka an-djamaã, misi furswa amba izi hu tompinshandza.
- 2. Tsisi hulunu mbu heti fahanana bilà sibabu amba izi kaza utompin-shandza.

Kanuni faha fulu valu ambini:

Kula hulunu misi haki an-fihisiana nafasi nin-fikufikiriana, nin-fikurumianana akili-musingi ndreka nin-fihisiana dini; haki iti mikuruhusu hulunu mamadiki dini au fikira, ndreka manamia hulunu nafasi mampahei dini au fikira nazi izi areki au ndreka ri namani rangu an-karamandza ata an-tranuni; amin'ni fidzuruana izi, amin'ni fananovana ibada ndreka mahafala mifotrutu dini iti.

Kanuni faha fulu sivi ambini:

Kula hulunu misi haki an-fihisiana nafasi ninfanabwahana fikira ndreka nin-fivulanana; maanani iu, hulunu misi haki an-tsifiampidzalina hulunu hatasibabu nin-fikira nazi; an-fahazuana ndreka fanabunuana bila tsisi fikutundana mupaka, kabaru ndreka fikira, an-kula lalana mbu kurumianana.

Kanuni faha arompuluni:

- 1. Kula hulunu misi haki an-fihisiana nafasi nin-fivuriana ndreka nin-fananovana shama tsisi tashahushi.
- 2. Tsisi hulunu mbu atou nguvu ihiditri an-shama.

Kanuni faha arompulu areki ambini:

- 1. Kula hulunu misi haki an-fangalana fuvu anfanandesana kabaru mifotutru hulunu diabi an-tani nazi, nahika ro hulunu tompini au amin'ni hulunu manatitri wakala nifidanana an-nafasi.
- 2. Kula hulunu misi haki an-fihisiana lalana, mikustehi masharutwi nin-fihirana, iditri an-hasa ki sirikali nin-tani nazi.
- 3. Nia nin-zanatani io ro musingi nin-yezi nin-sirikali ; nia itì nikulazimu kutekelezana amin'ni voti mazava nikulazimu natou kula mumba muda, amin'ni lalana mikukarbisa hulunu djabi an-fihiranana, amin'ni voti ninsiri au manaraka fomba mirana ndreka voti nin-siri, mikuruhusu unafasi nin-voti.

Kanuni faha arompulu aroi ambini:

Kula hulunu, amin'izi hulunu nin-djamaã, misi haki anfazahuana hifadhwi ki fihavanana (ki siraki); musingi nin-hifadhwi iu, ro fikutsimidzana haki mifotutru ãkiba, udjamaã ndreka utamaduni muhimu an-hishima nazi ndreka an-huvambufu an-nafasi nin-twerana, hatasibabun'ni djitihadi ki tani ndreka fishirikana ki ulemengu, hatasibabun'ni namuna nin-kupangana ndreka rasulimali nin-kula tani.

Kanuni faha arompulu telu ambini:

- 1. Kula huluŋu misi haki an-fazahuani hasa ndreka anfihisiani shaɓaha an-fifidanani hasa amin'ni lalaŋa ninhaki bokeu kusutou nin-hasa ; ndreka misi haki anfikuhafadhwiaŋa izi ndreka fipitrahaŋa-ɓure.
- 2. Hulunu djabi, wala tsisi fifidanana, misi haki anfazahuana mushahara merana an-fananovana hasa mirana.
- 3. Kula huluŋu miasa, misi haki an-fazahuaŋa mushahara kusutou, modeli nikulazimu mbu ikuruhusu izi ndreka ri havani uhisi maisha ki uɓinadamu, bokeu meti susohinyi ndreka musada hafa nin-hifadhwi ki udjamaã.
- 4. Kula hulunu misi haki an-fikupangana ndreki ri havani, shama nin-fikudaiana haki nin-hulunu nin-hasa, an-fihidirani an-shama mikudifaĩ tanafu nazi.

Kanuni faha arompulu efatra ambini :

Kula hulunu misi haki an-fanabwahana vaha ndreka fangalana nafasi, amin'ni zenyi, an-fananovana mupaka mikustahiki amin'ni muda nin-hasa ndreka anfanabwahana vaha ifana nim-muda.

Kanuni faha arompulu dimi ambini:

- 1. Kula hulunu misi haki an-fihisiana daradja ninfikueshiana kiasi, mikuruhusu izi uhisi swiha tsara, ahazu faivanana, izi ndreka ri havana nazi, an-kabaru mifoturu, fihinanana, fisikinana, fihisiana tranu, fazahuana audi ki lopitali ndreka fazahuan-hulunu zema ki sirikali muhimu: izi misi haki an-fazahuani musada anwakati nin-fipitrahana-bure, nin-aretinyi, ninfikupunguzan'ni ziga, nin-fati nin-vadi, ninhaubakokuana, au am-mukabala nin-fihafahan-raha mampahazu hulunu maisha, hatasibabu nin-fandihana nin-kabaru bila uvhendza nazi.
- 2. Fitirahana ndreka hauzazana misi haki an-fazahuana musada ndreka fikututuɓiana mahususu. Zaza djabi, rangu reu nitirahinyi an-vadiana atà reu nitirahinyi antani, misi haki mirana an-fazahuana hifadhwi nin-taãɓu nim-maisha.

Kanuni faha arompulu tshuta ambini:

- 1. Kula hulunu misi haki an-fidzuruana. Fidzuruana nikulazimu bure, shingani ro, fidzuruana an-likoli madiniki. Fidzuruana hasan-tanana nikulazimu mibiana an-hulunu djabi; fidirana an-likoli nin-daradja anabu ninfidzuruana nikulazimu nibiana an-fihirana nin-ankitinyi, an-kula hulunu djabi misi maarifa uhiditri.
- 2. Fidzuruaŋa nikulazimu nikusudia utsatsarufu nimɓinadamu, faŋanovaŋa nguvu mastaha nin-haki-l-adamì ndreka nafasi musingi. Izi tihì nikulazimu nampandehaaluha fikuelewaŋa, muswamaha ndreka fiwandzaniaŋa nin-tani djabi, ndreka shikao nin-kaɓila au nin-dini ndreka fandihanaŋa-aluha nin-āmali nin-Uvumoja nin Twaifa (Shama nin-Daula nin-Ulemengu) fikututuɓiaŋa usalama.
- 3. Ri huluŋu maventi nin-huluŋu, misi haki an-fifidanaŋa amin'ni raha muhimu amin'ndreu, fidzuruaŋa tokutru ahazun-ndri zanakan-ndreu.

Kanuni faha arompulu fitu ambini:

- 1. Kula huluŋu misi haki an-fangalaŋa fuvu neka izi shoku, am-maisha ki tamaduni nin-djamaã, an-fangalaŋa ɓastwi nin-swanaã ndreka an-fangalaŋa ɓandza amin'ni fandihanaŋa-aluha nin-sayãsi ndreka atsaraŋa ahazuŋu an-raha retu.
- 2. Kula huluŋu misi haki an-fikuafadhwiaŋa zavatra nazi, rangu reu mifotutru ĩlimu ata zombo nikumbaŋa anfikurumianaŋa sayãsi, fanurataŋa buku au fikutrungaŋa kabaru, neka izi ro tompin'ni raha retu.

Kanuni faha arompulu valu ambini:

Kula hulunu misi haki an-fananovana modeli atà utrilivu amin'ni maisha ki binadamu ndreka amin'ni ulemengu ikubala atà haki ndreka unafasi nikudukurunu anatim- Matekelezo itì, ikurumianana namuna nin-kulazimu.

Kanuni faha arompulu sivi ambini:

- 1. Binadamu misi raha diasinyi ndreka izi amin'ni djamaã nazi ; amin'izi itì, fikuvambusan'ni tweraŋa nazi annafasi, iu tu ro raha isiani ruhusa maŋanu azi.
- 2. Amin'ni fikurumianana hakin-hulunu, ndreka fihisianhulunu nafasi, raha retu djabi misi mupaka napetrakansharia. Makuswada nim-mupaka retu, izi ro fananovana modeli ata fikubaliana ndreka mastaha nin-haki ndreka nafasi nin-havana ikueshi; amin'ni fikusutehiana kua, masharutwi nin-ubinadamu, nin-utrulivu nintrengwe ndreka fiatsarana djumla nin-djamaã nin-ki nafasi.
- 3. Haki ndreka nafasi retu, ãla-kulli-hali, tsi uheti ikurumianaŋa amin'ni lalaŋa tsi miaraka ndreka makswada ndreka masharutwi nin-Uvumoja nin-Twaifa (Shama nin-Daula nin-Ulemengu).

Kanuni faha telumpuluni:

Tsisi atà sharia areki nim-Matekelezo itì mbu heti kutafaswirinyi amin'ni lalaŋa mikuruhusu, Daula, shikao au huluŋu areki, ihisi haki itsokao yotsi nin-faŋanovaŋa mahafala au ãmali mandrubaka haki ndreka unafasi nikudukurunu etu.